

# CANA NECOAAUNA NUNUHE

## Itolere coaanaa Cana Coaunerane

**1** <sup>1</sup> Jauriaanejeein itolere coaanaane nunuheneein jetaote, dede, chauratane, naaonjoaihunri coaanaaelu Cana Coaunera. <sup>2</sup> Nii bana jetao niheilulu caa ena aihane rijijieein atane. Satiin jetaote acau nelu ucuacaain, nocohena tabaineein. Nii jana Cana Coaunera Suujueecha, nii acau choae nerurujuarejethane jana jetaote:

<sup>3</sup> “Neeine conora.” naa Cana Coaunerane jaun jetao, necoaaunaaelu cono.

<sup>4</sup> Nitohaneein cono coaanaain coaraa Cana Coaunerane jana, rai caohatohane jaun jetaote, nocohena caje nii cono leruhin, <sup>5</sup> jiichooneein curuaatelu Cana Coaunera. Jana nocohena jetaote janotiinneein curuaatelu. Nitohaneein jetaote le jiichoonihane nainaelu.

<sup>6</sup> Nii baiha jetaote: “Neeine ita caje acau lerueranura. Aihate ita caje nelerumiin acaura.” naain ita caje acau lerueranu coaanaa Cana Coaunerane jaun jetao, ita caje neleruelu acau.

<sup>7</sup> Nitohaneein ita caje acau lerueranu coaanaa Cana Coaunerane jaun jetaote, ita caje acau leruha nii Cana Coauneraacha coaunaine jaun jetao, neleruhin cajichi que nedaane jana, rai neleru ecuun nedaelu. <sup>8</sup> Nii acau leruera jetaote curuaatelu dedeneein. Nitohaneein jetaote coroata jiichoonihane nainaelu.

<sup>9</sup> Nitohaneein ita caje neleruha acaune jana jetaote: “Le turijieein netaojiamiin dede nichaji que nelanaala cajichi que nena acaute; inanacaaine chauratanera.” naa Cana Coaunerane rijijieein jetao, ita aina netaojiaelu caa cajichi que eneenetojieein nena acau, cucuananeein niicha curuaateeni. Niritoha Cana

Coaunerane jana, inae jacorohane jaun jetaote, <sup>10</sup> nii jacorono curuaatelu ataneneein Cana Coaunera. Jana acau netaojianaa jetaote, curuaatelu cucuananeein. Nitohaneein coaunaain coaraa Cana Coaunerane jana, satiin rai caohatohane jaun jetaote: <sup>11</sup> “Omaromiin caa atane que itolere temulecuru atane jana jiinchuru neenihuru, temule inaana inaurera, chaen nunaanau lenacaineein inaana inaurera naaonjoaihunricha.” naa Cana Coaunerane jana, <sup>12</sup> omaroha itolere temulecuru atane jana jiinchuru neenihuru, temule inaana inaurera, chaen nunaanau lenacaineein inaana inaurera naaonjoaihunrine jana, coaraa Cana Coaunerane jana jetao, satiin rai caohachae. <sup>13</sup> Nitohaneein jetaote, nichata jiichoonihane nainaelu.

<sup>14-15</sup> Nitohaneein itolere coaunaacoaane baiha jetaote: “Neeine conooru, chauratane conaain, jiichoo, janotiin, naaonjoaihunri lerueranu que, nii acau leruera beraurosihojai quera. Chaentechu jataain nelatineein nenacaauru janonaa, ajaanaa naaonjoaihunri coujunacane que nelatiha cuurureeincha.” nae jetao Cana Coaunera.

<sup>16</sup> Nitohaneein jetaote, coroatajaain cono coaunaaelu, leinjiin tasinojoaain, leinjiin aansijieein, naaonjoaain janotiin, jiichoo, naaonjoaihunri conaeranu que Cana Coaunera. Nii tasinojoaain niicha coaunai jetaote, jiichoo conaeraneein coaunae. Jana aansijieein niicha coaunai jetaote, janotiin conaeraneein tein coaunaain, arasijieeurune maajeein coaunaaelu. <sup>17</sup> Nitohaneein coroatajai cono coaunaain jetaote, dedeeu telu Cana Coaunera, chauratane que <sup>18</sup> janotiin, jiichoo, naaonjoaihunri conaain, ita caje janotiin aina jiichoo lerueranu que. Nitohaneein coaunaain coaraa Cana Coaunerane jana jetaote, satiin rai caohachae. <sup>19</sup> Nitohaneein jetaote, jena jiichoonihane nainaelu.

<sup>20</sup> Nii baiha jetaote: “Neeine itolere caa acauhanau lauri lauri ichaohin neenihuru, lauri lauri atane choae jiaauluhin amuenihuru tajaecuru, naaonjoaihunricha.” nae jetao Cana Coaunera.

<sup>21</sup> Nitohaneein jetaote, itolere cucuana cuhane ichaohin neenihuru, itolere jataain tabaihuru cucuana cuhane neenihuru naaonjoaihunrine maajeein coaunaain, itolere tajaecurune

maajeein coaunaelu Cana Coaunera. Nitohaneein coaunaacoain coaraa Cana Coaunerane jana, rai caohachaane jaun jetaote:

22 "Arajiin calaojoiin nefaain cucuana cuhanai nemoaain, tajaacurune maajeein arajiin nefaain, chauratane sacuritaain calaohicuchera." naain jetao nii itolere lauri lauri niicha coaunaauri corojeein cojiotae Cana Coaunera.

23 Nitohaneein jetaote, saoqui janohane nainaelu.

24 Nii baiha jetaote: "Neeine itolere lenonecuru lauri lauri nunaanau neenihuru, atane choae tijiariin amuenihuru, nenaanajau irineein neenihuru naaonjoaihunricha." nae jetao Cana Coaunera.

25 Nitohaneein itolere lauri lauri neenihuru coaunaain coaraa Cana Coaunera jana, satiin rai caohachaane jaun jetaote:

26 "Coanete laen enene cacha coaunaaca. Jerichanejeein cana rijijieein nihane, ateeuru, tajaacuru, lenonecuru, nenaanajau irineein neenihuru, nunaanau ichaonacaauru, atane choae tijiariin amunacaauru, naaonjoaihunri amurijiriin itolere ichana naineraneeinte niha cureeinha." nae jetao Cana Coaunera.

27 Nitohaneein jauriaanejeein neeni cacha coaunaain jetaote, jerichanejeein rijijieein jetao coaunaelu Cana Coaunera.

Nitohaneein quicha, ene, naaonjoaain coaunaain jetaote:

28 "Arajiin berecohacoain nefaain, chauratane cuhane sacuritaain curuaanaa neechuru neeuchera.

Chaen caohachaain ateeuru, tajaacuru, itolere lauri lauri tijiariin amunacaauru naaonjoaihunri amurijiriin, caohachaain itolere que nelateein neeuche."

naain jetao acaauru corojeein cojiotanajae Cana Coaunera.

29 Niritoha acaauru raine baiha jetaote: "Aonacuche, itolere temule atane jana jiinchuru neenihuru, temule inaana inaaunrera, chaen nunaanau lenacaineein inaana inaurera naaonjoaihunrine inara rai teeun. Acaaurute nelatereein inara lenonenu quera.

30 Jana nunaanau ichaonacaauru, atane choae tijiariin amunacaauru, tajaacuru, naaonjoaihuri raine ajena teeun acaauru lenonenu quera." nae jetao Cana Coaunera.

31 Nitohaneein itolere niicha coaunaacoai coaraa Cana Coaunerane jana jetaote, satiin jataain rai caohachae. Nitohaneein

jetaote, saota janonihane nainaelu.

**2** <sup>1</sup>Nitohaneein jetaote, dede, cana rai chauratane, itolere coneraniha neenihuru naaonjoaihunri coaunaane nainaan, <sup>2</sup>caainsi janone cuhane nebetacaelu Cana Coaunera. <sup>3</sup>Nii nebetacaane janonaa que jetaote: “Caa caainsi janonete leeochoaauru janonaa amurijiriin, jataain janonaa caohacha ne caraicha.” naain jetao, nebetacanaa cojoanonaaneein nihane coina aitelu Cana Coaunera, bana itolere coaunaane nainaan nebetacaane jaun.

<sup>4</sup> Nitohaneein jetaote, necoaunaelu cana rai chauratane aina dede.

### **Eden batane que ocoana coaunaain, jana niicha coaunai cacha tiha Cana Coaunerane**

<sup>5</sup> Jauriaanejeein dede aina atane coauna Cana Coaunerane jana jetao niheilu ajena, nii temule nihanatiin; jaiti atane setejiiane coina elo coaunaeniha Cana Coaunerane jaun. Nii cacha nihanatiin jetao niheilu, que temule jaane coina. <sup>6</sup> Ne jetaote laen acauhacha, itolereenein satiin atane sacuritaain mituelu.

<sup>7</sup> Nii jana jetaote, atane caje cacha coaunaain, rai nasi jijiin ichaonaa te Cana Coaunera. Nitohaneein tiha Cana Coaunerane aina jetaote, jauriaanejeein ichaohane nunuhetelu nii cacha niicha coaunai.

<sup>8</sup> Nii cacha coaunaane baiha jetaote, enoto mitu uuri nichaji que nena Eden batane que ocoana coaunaain, ecu nii cacha te Cana Coaunera. <sup>9</sup> Nitohaneein ocoana coaunaain jetaote, jana itolere caohatonanaain enuha quinacainein inaana inaurera coaunae omarohane coina. Nii ocoana cataaun jetaote, coroata nujuaain enuha inaa coaunae. Nii ele nujian jetaote ninaa quihacane, caje itolere baaso, itolere caohacha naaonjoaihunri coitucueratera ne. Jana nii leocha jetaote, ichaonaa tera ne.

10 Nii Eden caje necoaaunaain jetaote, jena turiin nii ocoana sacuritaain nelerurujui nucuhe. 11 Jauriaanejeein neleru nucuhe Pison jetaote, nii oro siricha Habila batane sacuritaain cue. 12 Nii jelai batane que nenea oro jetaote caohacha ne. Chaen jetaote, ecu ne sacari caohacha, atane jana jiquihaquiin riria seeonjoa rijijieein nenea onesi naaonjoaihunri. 13 Nii coroata neleru nucuhe Gihon neein curuajai jetaote, Cus batane sacuritaain cue. 14 Nii nichata neleru nucuhe Tigris jetaote, Asiria batane uuri enoto mitu nichajai que situnaa ne. Nii nejena neleru nucuhe jetaote, Eufrates ne.

15 Nii Eden batane que nenea ocoana coetaain beraihane coina, jana nii niicha coaunai cacha teein jetaote: 16 "Nainereei satiin caa ocoana jana nenea enuha inaa raain quiinera. 17 Nete laen naineneei nii baaso, caohacha, naaonjoaihunri coitucuha cachane coina nenea enuha inaa raain quiinera. Esinae rauhijiriin, nii enuha inaa quiinete oriquincha." naain jetao nii cacha suujuate Cana Coaunera.

18 Niritohane baiha jetaote: "Caohachaa corihanera colane niha caa cachaneta. Nii jaunne leinjiin suujua rijijieein corihaneraanu coaunareeunra." naain jetao, 19-20 jauriaanejeein atane caje itolere lauri lauri nunaanau ichaonacaauru coaunaain jetao, tajaecurune maajeein coaunaain nii cacha rai te, acaauru curuaatihacoane coina Cana Coaunera. Nii jaun jetaote, jitariin nii nanaanajau lauri lauri irineein neenihuru, nunaanau lauri lauri ichaohin neenihuru, naaonjoaihunri curuaatein jetao, itolere tajaecuru lauri lauri nenacaaurune maajeein curuaate nii cacha. Nii curuaatenajaane que jetaote, eneenetjoeein curuaacure. Ne jetaote nii chuni, rai corihaneraanu que nelatecurenihane jaun jetao, 21 nii cacha sinae Cana Coaunera. Inae sinitoha nii cachane jana, rai nichuhi rocohin jerichanejeein jaberoco raurononeein teein, 22 nii nichuhi caje leinjiin ene coaunaain nii cacha rai tiha Cana Coaunerane jana, 23 coariin jetaote: "Caate cajabereeo que jaberocohin, cabucuuru que bucuhin, canu jaberoco caje rocohin Cana Coaunera coaunanohinera. Aihane jaunne, 'ene' naain curuaatereunnicha." nae jetao nii cacha.

24 Nitohanihane jaun jetaote, rai inaca, rai neba, naaonjoaain ratiriin amuhin necoasaijiae cacha. Chaen jiniiquiin leinjiin cachaneein nenanaa rijijieein neeure.

25 Machorijatiin comasai aina jiniiquiin neeruha natiin jetaote, nii ita que coejelanaala neeure jiniiquiin.

## **Cana Coaunera ere tonoraareniha Adan aina Ebane**

**3** 1 Nii jana acano jetaote, itolere lauri lauri Cana Coauneraacha coaunaacoai amurijiriin, jataain nainaan casajeneein, nechua aansainihane jaun jetao:

“Aihana jaunna, caa ocoana jana nenea enuha inaa raain leeichene caohatiha Cana Coaunera.” naain nii ene caje bajaane jana jetaote:

2 “Eenjeen, nainichaanu niqii satiin caa ocoana jana nenea enuha inaa raain quihacaanune. 3 Nete laen, caa ocoana cataaun nenea enuha inaa dadaacaanune caohate Cana Coaunera, nii dadaain lihacaanune jerelanaala. ‘Lihacaanune jene orichaanu.’ naane jaun.” nae jetao nii ene.

4 Nii jaun jetaote:

“Nohaniha. Coatiha oriheeincheein leeichene nihanatiin.

5 Nechu rijijieein itolere baaso, itolere caohacha, naaonjoaain coitucuhichene coataate, nii enuha inaa leeichene caohate Cana Coaunera.” nae jetao nii ene rai acano.

6 Nii jana nii enuha inaa coaraa nii enene jana jetaote, caohatiin raotohanai tocorijia nihane jaun jetao, taain le nii ene, coritaa acanone jaun coitucunaa jerenacaan. Nii enuha inaa taain lihane baiha, lana rai tihane jaun jetaote, acaentonai le. 7 Nii rijieeonritiin machorojoatocuruhane que nainaan jetaote, ita que nocoejeeuruhane jaun, higuera alo

raain tocoocure, acaauru cajionenu que.

8 Nii jana sonaiha jouhacoha  
cujuanane jana, ocoana jana cuha Cana  
Coaunerane aonaain jetaote, nasi nii  
ocoana jana nena enuhacuru jana cuhin  
Adan, rai comasai aina.

9 Nii jana jetaote, Adan cotijiaain:

“Chute neeita.” naain caje bajaa

Cana Coaunerane jana jetao:

10 “Ocoana jana uhine  
aohariinne sorohin nasihun,  
machoharohanune jaun ii  
que coejihara.” naa Adanne  
jana jetaote:

11 “Cha iana ichei aite machoharohine que.

Jerihanete leeine coataa ichei caitoonjoan enuha  
inaa taain leeicha.” naain Adan caje bajaa Cana  
Coaunerane jana jetao:

12 “Nii cacorichaanu que carai iicha tei enete,  
carai nii enuha inaa uhaain tihane jaunne leeunra.” naa  
Adanne jana jetaote:

13 “Chanute nitohanai  
ichaaita.” naain nii ene caje bajaa Cana Coaunerane jana jetaote:

“Canu coritaa acanone jaunne, nii lihanune caohatiha carai  
caitoonjoan enuha inaa taain leeunra.” nae jetao nii ene.

14 Nii jaun jetaote, nii acano rai:

“Nitohanai ichaaine corenihate, itolere lauri lauri quiiha  
coaunaauri amurijiriin, nechua aansai taebinaeniha curiquiin ena  
caje coauneecha. Chaentechu, atane choae netararajeein  
amuhin ataneecha que lenonejeein ichaoriqiiin. 15 Nii jaunne ena  
caje coauneecha ita que nejeratena negin neeiche caa ene ainane  
coina ichareeunni. Nii jana ii nefoerateeurute, nejeratiha cureein,  
caa ene nefoerateeuru aina. Nii jaunte, caa ene nefoerateeuru  
churucuruhane naineein ichoturi faojoaain ii soha cuurureein. Jana  
iite acaauru maicho calaa curiquiinha.” nae jetao nii acano rai  
Cana Coaunera.

16 Niritiin jetaote, nii ene rai:

“Nitohaneeine corenihate, canaanaihuru siriine naineein, ichei cunaain caaintaain nejanoaa cuurureeinha. Nete atiin ii lana jereein aina raotojoein neriquiinha. Nii jana acate, chamurijiriin nereein nere tonoraaine coinara.” naain jetao, nii quicha rai:

17 “Nitohaneein ichohasai ere tonoraain, ichei leeine coataa caitoonjoan enuha inaa leeine jaunte, ii coreniha baasoniha curichaain caa atanene jaun, mainajeein amihaneein iicha quiine eruha curiquiin ohine jaan tiaaajoaaincha. 18 Chaentechu temule jaaine, ichei ojoa nocoharichaain caa atanene jaun, nunaanau nena enuha inaa quiha curiquiinha. 19 Nii jaunte mainajeein edorona jaohin amihaneein iicha quine eruha curiquiin, atane caje coaunanohineeine jaun, ohine bana jerichanejeein atane neein nedaa ijiabereeeone reentiaain. Nitohaneein atane caje coaunanohineeine jaunte, jerichanejeein atane jana nitajiha cureein ijiabereeeora.” nae jetao Adan rai Cana Coaunera.

20 Nitohaneein jetaote, satiin ichaohin neenihuru cachaauru neba nerichaaaine jaun jetao, Ebaneein rai comasai curuaate Adan.

21 Nitohaneein jetaote, lenonecuru cari caje cajione coauna, comasai aina Adan cajionenu que Cana Coaunera. 22 Nitohaneein cajione coaunaain jetaote:

“Enate laen, jerichanejeein cana rijijieein itolere baaso, itolere caohacha, naaonjoaain coitucuera nereeincha. Aihane jaunte nainere caa enuha inaa ichaonaa tera lihanera. Nitohaneein lihanete chariji bana nitajenaachara ichaonaa sirichera.” nae jetao Cana Coaunera.

Peru  
Urarina  
Gn  
1996  
Manus  
BL  
South Holland, IL  
[United States]  
B210570